

Comunidad ta cuestiona irregularidadnan den detencion di ex minister Croes



Detencion di ex-minister Glenbert Croes a causa conmocion den comunidad pa diferente motibo y mas recientemente esaki tabatin di haber cu un potret cu e casa di ex-minister Croes a publica

riba Facebook dia 10 di october. Esaki a trece confusion y cuestionamento pa motibo cu e ex-minister lo mester tabata den "beperking".

Despues cu a detene ex-min-

ister Croes Ministerio Publico a aplica riba e sospechoso restriccionnan den interes di e investigacion. Esaki ta nifica cu e sospechoso por tin contacto solamente cu su abogado y no cu otro hende.

Dia 11 di october Ministerio Publico a publica un comunicado den cual ta informa cu a suspende e detencion di e ex-minister bou algun condicion. Esaki ta nifica cu por lo pronto a laga e sospechoso den libertad, pero cu e mester mantene su mes na algun condicion cu hues a impone riba dje. Un di e condicionnan ta cu e sospechoso mester cumpli na yamadan di polis y husticia.

Esaki a trece duda y cuestionamento den comunidad pa motibo cu Ministerio Publico a suspende e detencion di e ex-minister diabierna 11 di october, pero e casa di e ex-minister a publica e potret diahuebs 10 di october, un dia prome, mientras

cu probablemente e tabata den beperking ainda y no tabatin mag di tin contacto cu ningun otro hende cu no ta su abogado.

Normalmente e proceso di Voorarrest den Codice Penal di Aruba cu ta cuminsa ora e persona ta keda deteni y ta wordo hiba na Warda di Polis pa seis ora y presenta dilanti un sub-fiscal na unda e sospechoso su derechonan ta wordo lesa y e ta wordo puntra si kier un abogado, akinan ta na unda e ta wordo interroga y asina por tuma su declaracion.

Despues di e 6 ora di interrogacion, e persona ta wordo informa sea cu si e lo bay cas of e ta keda deteni pendiente di investigacion (inverzekeringstelling). Si e persona ta wordo informa cu e ta keda deteni, den dos dia cu e ta den (inverzekeringstelling) e persona mester presenta dilanti un fiscal na unda e fiscal ta evalua e detencion di e sos-

pechoso y e declaracionnan di testigonan y sospechosonan.

E proceso ta continua riba evaluacion di e detencion y si tur cos ta bay legalmente, fiscal ta pidi un hues comisario si por tene e sospechoso te maximo 8 dia pa e bienestar di e investigacion.

Den caso di e detencion di ex-minister Croes e proceso no a bay segun loke ta prescribi den ley y esaki a genera pregunta den comunidad cuestionando si a caso e ex-minister, ken toch ta keda un sospechoso, a haya trato preferencial.

E irregularidad a cuminsa na momento cu a hiba e sospechoso Marinierskazerne. Bon Dia Aruba a puntra abogado di ex-minister Croes ki ta e motibo cu a hiba e ex-minister Marinierskazerne na luga di un Warda di Polis, pero e abogado a indica cu no sa dicon a haci esaki.

Presupuesto di Ombudsman aproba unanimamente entre intercambio di palabra di parlamentarionan

Ayera mainta na Parlamento di Aruba tabatin un reunion publico pa asina determina e presupuesto cu ta bay aloca pa Ombudsman, Sra. Jurima Bryson, e cual a transcuri cu cierto intercambio di palabra entre parlamentarionan pa loke ta trata e ausencia y e procedura con e reunion aki a tuma luga.

E reunion tabata planea pa tuma luga diabierna siman pasa pero segun declaracion di Raymond Kamperveen, parlamentario di partido Raiz, e biaha aki su persona no tabata den e funcion di presidente di parlamento sino cu tabata forma parti di e comision pa defende e presupuesto aki. Esun cu a keda encarga como presidente tabata e parlamentario di AVP Mervin Wyatt-Ras ken a sigura cu e reunion di diabierna ultimo no por a tuma luga pa motibo di ausencia di otro parlamentarionan y debi na esey a dicidi di cancela e reunion e dia ey y yam'e pa ayera dialuna.



Esaki a causa diferencianan entre parlamentarionan, como por ehemplo Edgard Vrolijk di fraccion di MEP ken a critica e ausencia di Ombudsman mes den e sala

y con e procedura pa e reunion aki a bay.

"Mi ta lamenta cu gañamento ta tuma luga, pasobra nos tabata akiden, nos di MEP

semper tabata cla pa e ley aki, nos a bin cune y nos a para pa lo cual ta e presupuesto," Vrolijk a bisa.

Den un discusion aki, el a sigura cu a comete hopi infraccion, cu a kibra articulo 26 di Constitucion, cu tabatin tardansa pa cuminsa e reunion y tambe a puntra dicon no a invita Sra. Bryson pa ta presente den reunion aki. "Atrobe un infraccion chikito pero cu envergadura grandi," el a bisa.

Den su opinion, el a trece dilanti cu "a nos a laga e presupuesto cla, no ta boso a traha riba dje pa hopi dia, no ta berdad. Nos a lag'e cla siman pasa y el a bay Raad van Advies un dia y bin back Sr. presidente. Mi ta lamenta si cu awe cu un Ombudsman cu mester tabata ta akiden, nos ta lubida di invit'e pasobra esey te e feeling cu tin. Ora cu nos ta atende cu reunion, nos tin conocimiento di ley, cu nos proceduranan pa asina nos no a haci e error ey," el a sigura.

Raymond Kamperveen a afirma cu tabata importante

pa aproba e presupuesto aki pa Sra. Bryson por cuminsa traha como Ombudsman y tambe nan a invit'e pa atende e reunion aki pero "si nos no ta pasa e presupuesto e no por cuminsa cu su trabou," el a sigura.

Debi na mal comentarionan cu semper ta bin dilanti entre parlamentarionan durante reunionnan publico en bes di enfoca riba e topico mes di e reunion, Kamperveen a sigura cu "nos tur akiden ta trahando pa un pais y nos tur akiden ta representando nos hendenan cu a vota pa nos, awor nos por tin un bay y bin pero esey no ta bay yuda pueblo na nada. P'esey mi ta bolbe ripiti, nos a bin pa pasa un begroting, si ta desea ora caba nos ta yama un reunion cu Ombudsman pa wak kico ta su plannan y kico e ta bay haci cu e placa, semper nos por."

Pa loke ta trata e votacion pa aproba presupuesto di Ombudsman pa asina e instancia aki por cuminsa realisa su trabou, el a keda aproba di manera unanime.